



## D'Scouts-Joer 2004/2005 bei de Scouten St. Martin Duelem

- Freides den 17te September 2004 huet sech eis Chefféquipe am Home RV gin, fir mat eisem **ST.Martins-Cheffdag** d'Weichen fir déi nei Saison ze stellen. Eis jonk Cheffen haten an der Vakanz hir Zeit hingginn, fir zesummen mat eisem neien Materialmeeschter, dem Jérôme, Uerdnung a System an eise Keller an eisen Home ze bréngen. Vill Stonnen hun sie investéiert, fir et flott a „cosy“ an eisem Home ze maachen. Dovun konnte mir lo profitéieren. Bei engem gudde Maufel gouf Bilan iwert déi vergangen Saison gemacht an zougleich vill nei Iddien zou engem Programmewurf verbonnen.
- De Weekend vum 18ten an 19ten September stung ganz am Zeechen vum LGS **Kongress a vum Cheffdag**, deen 2004 zu Réiser oofgehalen gouf, a wou mir mat enger stattlecher Delegatioun présent waren, fir d'Konsignen vun eisem Verband fir déi nei Saison ze kréien.
- Samsdegs de 25te September 2004 hat eise Grupp eng flott Première: een vun eisen Grënnungsmitgliedern, **d'Annouck Watgen gouf bestued**. Kloer datt mir do mat enger klenger Iwerraschung nëtt fehlen wollten. Leider konnt de Steve eis nëtt weider dobei hëllefen, hien huet mussen seng Gees versueren.
- Samsdegs den 2ten Oktober hun d'Wëllef hir **éischt Versammlung** ofgehalen, an d'Explorer an d'Pionnéier hun sech vun Dënschdegs dem 5ten Oktober un nees regelméisseg vun 19:00 bis 21:00 Auer am Home zesummenfonnt.
- Sonndes den 10ten Oktober hun mir , mat eisem neien Fändel, de Feierlechkeeten vum nationalen **Kommémoratiounsdag** eng gréng Fierwung ginn.
- Freides nuets den 15ten Oktober war' et an de Bëscher ronderem Duelem nëtt geheier. 2 daper Scouten , de Schildi an den Tom Steichen, waren an der Deischtert ënnerwee fir hier **Montée bei d'Pionnéier** ze maachen. Et soll vill knaschtegt Gezei dobei entstanne sinn...
- Dënschdegs den 19ten Oktober hun mir mëttes beim Carlo Zenneren Äppel a Vierz verwandelt. Sou konnten mir der méih kaler Joereszeit dach eng vun de gudde Saiten ofgewannen, an en gemeinsamt Grillen ronderem d'Lagerfeier huet den Mëtteg flott ofgeronndt.
- Samsdegs den 23ten Oktober, sinn mir mam Bus an de Möllerdall gefuer. Op der Sich no der Puppe Luzie hun de Bob Frieden, d'Marielle Kaufmann, de Steve Majerus an den Chad Vandivinit an den Hielechten an an de Fielsen, hier **Montée bei d'Explorer** gemacht.
- Vum 9ten November un huet **d'Nadine Vandivinit** eis Chefféquipe an de Versammlungen praktesch verstärkt. Et war daat e groussen Encouragement fir eis Cheffen. Verstärkung mat enger héich motivéierter an engagierter Cheftaine genau am richtigen Moment wou vill vun eisen jonken Cheffen wéinst Studien an der Woch am Ausland mussen sinn.
- Fir Samsdes den 13ten November haten mir eis Frënn op Duelem an den Home invitéiert fir zesummen **Märtensdag** ze feieren . No engem langen Fousstour duerch den Hierschtbësch op Waldbredimus ( mat Kaffispaus op der Klaus zu Trenténg) hun mir zu Waldbredimus zesummen Mass gefeiert, déi och e wéineg vun eis Scouten, zu Eieren vun eisem Patréiner dem hellege Mäerten , gestaltet ginn ass. Duerno gong vive ( mam Auto) op Duelem hannescht, wou mir aus engem décken Mäertensfeier d'Glous kruten, fir alleguer eng Trapperkichen ze brutzelen. Et war spéit éih mir un d'Essen koumen, mais duerfir huet och dunn ëmsou besser geschmaacht.
- Samsdegs den 27ten November hat eng gudd al Traditioun eis fest am Grëff. Eng grouss Zuel **Adventskränz** waren bestallt a mussten fir Owends bei de Leit an der Stuff sinn. Dank der excellenter Viirarbecht vun eiser Amicale, hun miir och deen Problem zur vollster Zefriddenheet vun allen Bedeelegeten geléist.
- Den nächsten Dag, um 1ten Adventssondeg, hun e puer Cheffen an eng Partie vun de Meedercher vun de Pio'en matgehollé bei der **Porte ouverte beim Buttek Mosaik** zu Fëlschdreff. Et war dat eng flott Geleegeheet matzehëllefen un engem Projet vun konkret geliewter Nächsteléift.

- Donnegdeg den 2ten Dezember waren 5 vun eisen Raro'en ( den Boris, de Fonny, de Gilles, de Machti an den Tim) geruff, fir eng Auszeichnung am Kader vum **mérite jeunesse benelux** iwerreecht ze kréien. Eise Grupp war alt nees eng Kéier hei bei gudd vertrauten, och wann wéinst hiren Studien keen vun eisen Frënn konnt perséinlech seng Insigne ofhuelen goen.
- ab Dënsdeg dem 7ten Dezember, hun eis Pio'en **d'Krëppchen** an der Duelemer Kiirch opgeriicht. Elo konnt Krëschtdag sou lues kommen.
- Dunn stung grouss Opreegung virun der Diir. Freides owends den 17ten Dezember 2004 sinn d'Raro an d'Pionnéier zu Didelég am Home St.Jean zesummenkomm an hun do **d'Montée** vum Chris, Dany, Edige an Thierry bei **d'Raro'en** erlieft a gefeiert. Mais sie haten nëtt lang hir Rouh. Well schons den nächsten Dag koumen vir d'éischt eis Wëllef mat den Auto'en an dunn nomëttes och nach d'Explorer mat de Velo'en do un fir zesummen mam ganze Grupp de **Wantercamp** ze erliewen. E bonnten a flotte Programm, zesummen mat engem richtegen Wanterabroch hun eis e flotten Camp erméiglecht, bei deem mir och nach Méindes den 20ten Dezember zu Réiser d'Friddenslicht vu Betlehem sichen waren.
- Op **Helleg Owend** waren mir dann Nomëttes ënnerwee, fir d'Friddenslicht vu Betlehem, e puer Kichelcher an e bës'chen Opmierksamkeet un eeler Mënschen aus eise Pooren an Dierfer ze verschenken. Sou konnten mir och dat Joer e puer Leit Luucht an d'Daischtert vun eiser Zeit ze bréngen an op e puer Plätzen hun mir kënnen eng Freed bei ale Mënschen erliewen, déi méih kostbar war wéi all Cadeau deen den Owend nach auszepaken war.
- De 4ten Januar 2005 hat eis Chefféquipe eng Entrevue mat den Responsablen vum Duelemer Jugendhaus. Mir wollten eis kennelëieren, an zesummen kucken waat wien , wéi mëcht, a waat een evt. zesummen kéint maachen.
- Vun Samsdes de 15ten Januar 2005 moies bis Sondes owens waren dunn **d'Blackbirds** zu Lenningen op engem **Weekend**. Sie haten d'Camp trophy an der Saison virdrun gewonnen, an dësen exklusiven Weekend bei zum Deel 7 Grad ënner Null war hir Belounung.Schaffen, Spiller beim Uewen, Schwammen an eng Ofschlosspizza hun deem ganzen en zünftegen Kader gin.
- De 25te Januar 2005 huet eise Grupp seng alljährlech **Generalversammlung** am Home ofgehal, an sou no baussen fir eng Gesond Transparenz an der Vereinsféierung gesuergt. Besonnesch spannend war vir eis d'Ausso'en vun der Mme. Buergermeeschter iwert hir Bereetschaft, mat eis op de Wee ze goen, deen mëttelfristeg a Richtung Neibau vun engem Scoutshome zu Duelem soll féieren.
- Dëschdes den 8te März haten mir all eise Scouten an all d' Frënn a Wohltäter vun de gréngen Hiemer owends an den Home invitéiert, wou mir mat Gegrills an Gedränk den **12te Gebuertsdag vum Grupp St. Martin** Duelem gefeiert hun.
- Vun Donnegdeg dem 24ten März 2005 (Gréngen Donnegdeg) owends un waren eng ganz Reih vun eisen Scouten mat enger spezieller Viirbereedung op Ouschteren beschäftegt. Bei der **Montée vers Pâques**, déi bis an d'OuschterSamsdeg Nuet gedauert huet, an déi mat enger allgemenger „ Resurrection Party" zu Enn gang ass, hun mir mol eng nei an intensiv Auseinandersetzung mat Ouschteren gesicht. Mat Nuetswuecht, Veillée, Film, Fastenlauf, JugendKraizwee, Beicht, Sauna an gemeinsamen Molzechten, hun mir Kiirper a Geescht op d'Feier vun der Auferstehung vun eiser Här Jesus Christus viirbereet. Sou Aktiounen sinn ëmmer méih wichteg fir eis't Selbstverständnis. wann mir nëtt eise Profil als „krëschtlech Scouten" lues a lues verléieren wëllen, müssen mir eis trauen, zou eisem Glawen an eisen krëschtlechen Traditionen ze stoen. An d'Bedelegung an d'Reaktioun vun eisen Kanner a Jugendlechen war ganz positiv. Schued war nëmmen , datt nëtt méih vun eisen Cheffen konnten ganz derbei sinn. Mais mol kucken...
- Et huet sech well zenter ville Joeren als Tradition agebiert, datt d'Chefféquipp op Ouschterméindeg den Terrain an d'Géigend vum Avex-Summercamp inspizéiert. Dat war dëst Joer , aus verständleche Grënn nëtt méiglech. Duerfir sinn mir Cheffen den 28 März am Home zesummenkomm, fir déi éischt konkret Pläng fir den Italien- Camp ze machen.
- Fir Samsdeg den 9ten Abrëll hat d'Kulturkommissioun vun der Gemeng Duelem op **d'Grousbötz** gerufft. Vill Scouten waren nees derbei, fir d'Gewan ze botzen an ze raumen. Elo konnt et Fréijoer gin.

- Vum 8ten bis den 10ten Abrëll hun eis Raro zu Duelem am Home, ënnert fachkundeger Leitung, en **Anti-Aids-Trickfilm** gedréit. Dësen Streifen sollt hinnen méih spéit den 3te Plaatz an engem nationalen Concours abréngen.
- Während deems hun och eis Explorer nach an de Versammlungen déi läscht Sequenzen vun hirem Film „**Looser héich 4**“ gedréint, mat deem sie schons um Wantercamp ugefang haten.
- Vun Dëschdegs dem 3te Mee 2005 owends un war décke Betrieb op der Scoutswiss. Grouss a kleng Zelter goufen opgeriicht, a masseg Geschirr ass op d'Wiss bruecht gin. Well :
- **d'Playbackshow an d'Scoutskirmes** waren fir den 4ten an 5te Mee 2005 ugesoot. Mat der cooler Bühn vun den LGS huet eis't Fest nach méih flott gewierkt an mir haten nees eng Bommestëmmung bei der Playbackshow. Mais och den aneren Dag, wou vill fleisseg Hänn, besonnesch och vun eiser Amicale, matgeholfen hun war e grouss Succès, an de Raym huet mat Genugtuung an seng Kees kënnen kucken.
- Vum 24ten Mee bis den 21ten Juni hun mir bei den Explorer nees **Feiermäntel** gebitzt. Dat ass eng richtig Aktioun am Scoutsënn, eppes mat den Hänn selwer schaffen, waat een nach nie gemacht huet, an dobei nach en nätzlechen Artikel hierstellen. Dat war nëmmen méiglech, well gudd Leit hir Zeit, hir't Können an hir Bitzmaschinn an den Dingscht vun eise Kanner gestallt hun. Hinnen all nach eng Kéier e ganz décke Merci.
- Samsdegs de 25te Juni haten eis Explorer Frënn a Famill op eng Welturopféierung an den Home invitéiert. Do sollt der staunender Fachwelt hiren Film „**Looser héich 4**“ präsentiert gin. Den Nomëtteg, deen mat Oskarverdeelung an standing ovations op en Enn gaang ass war op alle Fall e grouss Succès.
- Déi läscht 2 Versammlungen goufen dun nach genotzt, fir nach Mensch und Material op déi grouss Avebture Italien virzebereeden, a schons war de groussen Dag do.
- Sondes den 17ten Juli hun s'ech d'Scouten zu Duelem op der Wiss RV ginn. Onmengen u Material waren an de Bus ze verstauen an dun goug et lass a Richtung Italien fir den **Insieme 2005-Camp**. 12 Deeg mat den 3 Branchen ( Avex, Pios an e puer Raro) stoungen do um Menu, mat als Beilagen: Visiten, Hike an d'ItalienschHauptstadt de Séi, d'Mier, Sport a ganz super Wieder an enger wonnerbarer Landschaft ënnert Scouten aus friemen Länner . Et war einfach mega. Total geschlaucht awer déck zefridden sinn mir den 30te Juli nees doheem ugelandt.
- D'Saison war nach nët ganz eriwier. Well bis den den 30te Juli waren nach eis Wëllefcher fir e puer Deeg op d'Rees gang fir an Holland mat „ **Experimenter**“ e flotten a léierreichen Camp ze erliewen.
- Mais och elo war d'Saison nach nëtt ganz gelaf. Mat enger **Hochzeit** hat se ugefang, mat enger Hochzeit sollt se och ophalen. Den 13ten August hun mir dem **Lisi an dem Tom Lahr** de Réck gestaipt, wéi sie s'ech zu Fëlschdreff virum Härgott hirt JoWuert gin hun. Als Offallprodukt hun mir dobei der Welt nach déi revolutionnaire Tandemaxt geschenckt.

Niewt dësen Aktivitéiten gehéieren weider opgezielt: Ëm déi 90 Versammlungen mat eise Scouten ( all 4 Branchen zesummen), 5 Grupperéit, an eng ganz Rëtsch Präparatiounstreffen vun de Cheffen. D'Vakanz war dach och dëst joerverdängt oder ?